

TEZĂUR LITURGIC
11 MARTIE

ACATISTUL
SF. IERARH
EFTIMIE,
ARHIEPISCOPUL
NOVGORODULUI



MOSCOVA, 2000



Акафист преподобному Евфимию, архиепископу Новоградскому, чудотворцу

Кондак 1

Возбранный воеводо и пастырю священнейший великаго Новаграда, иноков наставниче и ангелов собеседниче, скорый помощниче и молитвенниче наш святителю Евфимие, прими усердно приносимая тебе сия богохваления и твоими молитвами от всяких нас бед свободи, да зовем ти:

Радуйся, отче Евфимие, святителю предивный.

Икос 1

Ангельски на земли отче пожил еси, с плотию яко безплотен Евфимие. Темже со безплотными на небеси водворяяся, от нас земных прими песнь сию:

Радуйся, от чрева матерня очищенный.

Радуйся, благодатию Святаго Духа освященный.

Радуйся, рождеством твоим неплодие родителей разрешивый.

Радуйся, скорбь их в радость преложивый.

Радуйся, неплодныя матери чудное прозябение.

Радуйся, священника Господня благодатное

процветение.

Радуйся, благаго корене отрасли пречестная.

Радуйся, прекрасный цвете Божия насаждения.

Радуйся, от младенчества рукою Всевышняго знаменованный.

Радуйся, от пелен в служение Ему избранный.

Радуйся, по рождестве твоём всемогущему покрову Заступницы Мира врученный.

Радуйся, от Нея на добродетель наученный

Радуйся, отче Евфимие, святителю предивный.

Кондак 2

Видя Господь слезы и воздыхания твоих благочестивых родителей, слыша моления их, неплодия узы разрешив, плод благославный дарова им тя, преподобне отче, во умилении сердца зовущих: Аллилуиа.

Икос 2

Разум богомудрый стяжав в души твоей, святе Евфимие, измлада суеты мирския уклонился еси, пустынное же возлюбил еси житие, дом родителей оставив, во обители святителя и чудотворца Николаа, яже на Вяжищи, вселился еси, к подвигом иноческим усердно устремился, таковому твоему богомудрию дивящися, похвалы тебе сия восписуем:

Радуйся, сладости и утехы мира сего презревший.

Радуйся, горняго любомудрия возжелевый.

Радуйся, просветивый измлада ум твой
изучением писаний Божественных.

Радуйся, пленивый волю твою в послушание
закону Господню.

Радуйся, сердце твое от всякия лести
душевредныя чисто сохранивый.

Радуйся, разум твой от помыслов суетных
очистивый.

Радуйся, яко Отца Небеснаго паче земных
родителей возлюбил еси.

Радуйся, яко Христа ради дом отыйй оставил
еси.

Радуйся, девства и целомудрия усердный
хранителю.

Радуйся, иноческаго жития истинный любителю.

Радуйся, подвиги твоими начальника тмы
низложивый.

Радуйся, постом и молитвами вся коварства его
упразднивый.

Радуйся, отче Евфимие, святителю предивный.

Кондак 3

Сила Вышняго осени тя к плодоношению
духовному, премудре Евфимие, и образ тя
добродетельнаго жития всем показа хотящим
наследовати спасение, внегда пети сице:
Аллилуиа.

Икос 3

Имея ревность Божественную о спасении твоём, преподобне, потщался еси со страхом и трепетом Господеви послужити; в трудех бо постнических и послушании мнозем жизнь твою провождал еси. Темже и нам в трудех и борении помози, заступниче наш, да всегда благодарно зовем ти:

Радуйся, от юности мудрости прилежавый.

Радуйся, благое иго Христово на себе восприемый.

Радуйся, постническими подвиги вся плотская мудрования умертвивый.

Радуйся, во удручение плоти вериги непрестанно на телеси твоём носивый.

Радуйся, паче всех добродетелей нищету духовную возлюбивый.

Радуйся, вся красная мира сего ни во что же вменивый.

Радуйся, правило христоподражательнаго жития.

Радуйся, образе монашескаго послушания.

Радуйся, яко в труде и подвиже непрестанно пребывал еси.

Радуйся, яко того ради вся душеполезная благая стяжал еси.

Радуйся, во образ ангельский на земли облекийся.

Радуйся, ангельским чином на Небеси ныне соводворяйся.

Радуйся, отче Евфимие, святителю предивный.

Кондак 4

Бурею искушений различных мняше враг многокозненный от добродетельнаго твоя жития отвратити, преподобне отче; ты же по словеси Господню молитвою и постом от ног твоих делече отразил еси того, присно моляся и поя: Аллилуиа.

Икос 4

Слышав блаженный Симеон, святитель Новаграда, твое богомудрое житие, отче Евфимие, управителя над всем домом и именем своим твоя поставляет яко мудра строителя и верна. Мы же поминающе светлейшыя добродетели твоя, научаемся звати тебе:

Радуйся, верный и добрый слуго Господень.

Радуйся, усердный делателю винограда Христова.

Радуйся, Божественных велений благочестный исполнителю.

Радуйся, создержанием всяким тело твое духу покоривый.

Радуйся, уставов церковных преизрядный рачителю.

Радуйся, на высоту безстрастия возшедый.
Радуйся, истинного смирения зеркало.
Радуйся, кротости и незлобия светлый образе.
Радуйся, яко врученный тебе талант мудрости
под землею не сокрыл еси.
Радуйся, яко дарования душевная твоими труды
преумножил еси.
Радуйся, благий рабе, в радость Господа твоего
призванный.
Радуйся, предстателю о нас пред ним
непостыдный.
Радуйся, отче Евфимие, святителю предивный.

Кондак 5

Боготечною стезею в тихое пристанище спасения
устремився, преподобне, молитвам и милостыни,
отче прилежал еси, тленное богатство в
нетленное прелагая, Христу же зовый: Аллилуиа.

Икос 5

Видеша людие новоградстии тя богоблаженне
Евфимие, яко светильника светозарнаго, на
свещнице добродетелей дивно сияюща и на
святительский престол Великаго Новаграда
единодушно тя призывают, ихже благочестное
избрание яве и судом Божиим утвердися,
жребием данным, таковому промыслению
Божию о тебе чудящися, вопием ти сице:
Радуйся, всенародным множеством на

святительский престол избранный.

Радуйся, Вседержительною Десницею во архиереях утвержденный.

Радуйся, Великаго Новаграда многоименная славо.

Радуйся, обители вяжищския честная похвало.

Радуйся, церковь Божию твоими учении украсивый.

Радуйся, людьми, Богом тебе врученными, ко спасению руководивый.

Радуйся, яко о стаде твоём непрестанно попечение имел еси.

Радуйся, яко многия от вечныя погибели избавил еси.

Радуйся, неразумных человеков вразумителю.

Радуйся, скорбных и печальных утешителю.

Радуйся, погибающих надеждо и исправление.

Радуйся, беспомощных заступление.

Радуйся, отче Евфимие, святителю предивный.

Кондак 6

Проповедник доброголасный Христова Евангелия показался еси, богоизбранне архиерею Евфимие, сладость Божественную от уст твоих источая, еюже напитавшеса чада твоя, тебе добраго пастыря почитаем, Христу же зовем: Аллилуиа.

Икос 6

Возсиял яко лучезарное солнце на священное
возседе седалище, Великий Новград блистанием
премудрых учений твоих чудно озарил еси, сего
ради зовем ти:

Радуйся, добротами святительства
преукрашенный.

Радуйся, архиерею Божий, душою и телесем
воистинну преосвященный.

Радуйся, пастырю словесный стада Христова.

Радуйся, премудрый учителю наследия
Иисусова.

Радуйся, Пресвятая Троицы служителю верный.

Радуйся, Духа Святаго жилище преукрашенное.

Радуйся, вдов и сирот благое попечение.

Радуйся, странных и обуреваемых готовое
пристанище.

Радуйся, корабля святых Церкви добрый
кормчию.

Радуйся, в мори житейстем плавающим верный
путеводителю.

Радуйся, в тихую пристань спасения души
человеческия направляяй.

Радуйся, заблудшыя на путь добродетели
наставляяй.

Радуйся, отче Евфимие, святителю предивный.

Кондак 7

Хотяй Христос спасения всем человеком, тя святителя преудобренна, поставляет людем своим и Церкви светильника пресветлаго, сиянии спасительных словес твоих верныя вся и просвещающа и научающа пети: Аллилуиа.

Икос 7

Новград Великий, стяжав в себе пастыря заступника, светло о тебе хвалится, святителю Евфимие, имея тя яко стену неборимую и столп непоколебимый; мы же чада твоя, во обители твоей живуции, к твоему заступлению усердно притекаем, молящся и зовуще тебе:

Радуйся, святителей веселие.

Радуйся, архиереев красото.

Радуйся, монашествующих утверждение.

Радуйся, постников удобрение.

Радуйся, праведных радование.

Радуйся, грешных спасение.

Радуйся, апостолом единокорный.

Радуйся, безплотных сожителю.

Радуйся, диавольских козней разрушителю.

Радуйся, подвизающимся на невидимыя враги помощниче.

Радуйся, ангеле Божий земный.

Радуйся, человеке небесный.

Радуйся, отче Евфимие, святителю предивный.

Кондак 8

Странное Бога вочеловечение непрестанно помышляя, красоты мира сего всеконечне устранился еси, богомудре, не стяжал бо еси имети zde пребывающаго града; горняго же отечества со тщанием взыскал еси зовый: Аллилуиа.

Икос 8

Весь был еси в пастве твоей всем помощник, богоносне Евфимие: нищым питатель, печальным утешитель, бедствующим заступник, о всех попечение твоя и всех подвизая вопити: Радуйся, во всяких нуждах скорое вспоможение. Радуйся, в печалех быстрое услышание. Радуйся, немощных и убогих присный помощниче. Радуйся, во озлоблении сущим готовейший заступниче. Радуйся, сирых и безприютных покровителю. Радуйся, треволнений и бурь житейских укротителю. Радуйся, яко утопающим в пучине греховней руку помощи простираеши. Радуйся, яко самых отчаянных из рова погибели исхищаеши. Радуйся, имя твое святое усердно призывающим помогаяй. Радуйся, от всяких напастей и обстояний

избавляяй.

Радуйся, щедрот преизобильных подателю.

Радуйся, милости и чудес источниче.

Радуйся, отче Евфимие, святителю предивный.

Кондак 9

Все естество ангельское удивися величию подвигов твоих, отче священнейший Евфимие: в телеси бо сый, сих поревновал еси, вся плотская взыгrania умертвив; живый яко безплотен, во дни и нощи пел еси: Аллилуиа.

Икос 9

Ветий краснословесных преизящнейший явился еси, преподобне, паству твою непрестанно в законе Божием поучая и на путь добродетели прилежно наставляя; темже ко пристанищу спасения направи и нас, угодниче Христов, приносящих ти благохваления сицевая:

Радуйся, доброголасный органе Духа Пресвятаго.

Радуйся, сладкозвучная цевнице Иисусова.

Радуйся, наставниче преизрядный спасения.

Радуйся, кающимся пред Богом крепкое заступление.

Радуйся, души алчущих хлебом небесным богато напитавый.

Радуйся, жаждущих сердца Божественным веселием исполнивый.

Радуйся, яко бдением и милостынею Богови

соединился еси.

Радуйся, яко добродетелми твоими Духу

Пресвятому жилище явил еси.

Радуйся, Божественнаго разума
преисполненный.

Радуйся, страх Божий в сердца твоем
стяжавый.

Радуйся, умом Христовым обогативыйся.

Радуйся, раноангелен в житии явивыйся.

Радуйся, отче Евфимие, святителю предивный.

Кондак 10

Спасти хотя душу твою, о телеси твоем небрега
еси, отче наш Евфимие, сего ради и вериги
тяжки до конца дней твоих на телеси тайно
носил еси, от нихже многая чудеса и исцеления
по смерти твоей источаеши с верою
притекающим, Богу же вопиющим: Аллилуиа.

Икос 10

Стена еси иноческому чину и всем к тебе
прибегающим: темже и нам, любовью чтущих
тя и раце мощей твоих поклоняющихся с верою,
буди ограждение крепкое, да тобою от всех
наветов вражиих избавльшися, умильно зовем
ти:

Радуйся, столпе непоколебимый Церкви
Христовы.

Радуйся, твердое верных прибежище.

Радуйся, крепкое падающих возведение.
Радуйся, право стоящих утверждение.
Радуйся, согрешающих кроткий обличителю.
Радуйся, непокорных премудрый исправителю.
Радуйся, правды ревнителю неустрашимый.
Радуйся, благочестия поборниче
непреборимый.
Радуйся, не словесы точию, но паче делом и
образом жития твоего всех к Богу приводяй.
Радуйся, верныя к радости духовной призываяй.
Радуйся, унывающим велие радование.
Радуйся, скорбящим душам сладкое утешение.
Радуйся, отче Евфимие, святителю предивный.

Кондак 11

Пение всеумиленное приношаху тебе вернии
твои людие по чуднем твоём отче, к Богу
отшествии, с плачем велиим провождающе тя
на место упокоения в любимую обитель твою;
слезы многия о разлучении твоём проливаху, со
воздыханием моляще и вопиюще псаломскую
песнь: Аллилуиа.

Икос 11

Светозарная звезда явился еси, богоносне
Евфимие, небо церковное украшающая и мрак
демонский далече отгоняющая: темже и наша
сердца омраченная грехми просвети,
наставниче наш, и к свету покаяния возведи, да

зовем ти:

Радуйся, свеще, божественным огнем
пламенеющая.

Радуйся, заре от трисолнечнаго света.

Радуйся, пресветлейшаго священства правило.

Радуйся, лучезарное добродетельное сияние.

Радуйся, светило, мрак уныния и скорби
разгоняющее.

Радуйся, деннице, верных души и сердца
просвещающая.

Радуйся, тихим светом смирения и любви нам
сияй.

Радуйся, в нощи греховней блудящим зарею
покаяния возсиявый.

Радуйся, яко светлою памятью твоею нам паче
солнца блистаеши.

Радуйся, со Христом пребываеши во славе.

Радуйся, яко светом небесным житие наше
озаряеши.

Радуйся, трисиянныя зари наслаждаеши яве.

Радуйся, отче Евфимие, святителю предивный.

Кондак 12

Благодатию чудес и знамений, дивно ты
прослави Христос, святителю Евфимие: по
шести бо надесятех днех преставления твоего,
прииде посланный от первосвятителя Ионы с
грамотою к тебе, и егда отверзоша раку твою
обретеса честное тело твое нетленно; и грамоте,

прочтенней бывшей над гробом твоим, ты, аки жив сый, в преподобней твои руке сию приемлещи. Людие же видевшыя сия, велми удивляхуса и прославляху Бога, дивнаго во святых Своих, поюще: Аллилуиа.

Икос 12

Поем твое равноангельное житие, славим твоя дивныя подвиги, почитаем досточудную кончину и со благоговением целуем твою священную раку, хвалебно зовем ти:

Радуйся, неоскудных исцелений источниче.

Радуйся, страждущих и недужных премилостивый врачу.

Радуйся, и по кончине паствы твоея не оставивый.

Радуйся, всем и коемуждо яже ко спасению у Господа испросити готовый.

Радуйся, земною нищетою небесное богатство стяжавый.

Радуйся, временною скорбию жития сего вечную радость получивый.

Радуйся, подвиг течения твоего добре совершивый на земли.

Радуйся, венцем неувядаемым увенчанный на небеси.

Радуйся, многи священныя храмы во славу святых Божиих создавый.

Радуйся, в райских селениях ликом их

сочетавайся.

Радуйся, великаго Мир Ликийских Чудотворца в житии твоём усердный чителю.

Радуйся, в горних обителях присный его сожителю.

Радуйся, отче Евфимие, святителю предивный.

Кондак 13

О премудрый и всехвальный архиерею чудотворче святыи Евфимие! Хвалебную песнь сию приими от нас тебе усердно воспеваемую: охраняй нас молитвами твоими святыми, избавляй от всякаго злаго обстояния и скорби, да тихое житие на земли поживше, блаженство вечное наследим, и купно с тобою и всеми святыми сподобимся воспевати Богу: Аллилуиа. Кондак сей глаголи трижды, таже Икос 1-й и Кондак 1-й

Молитва

О святителю Христов Евфимие! От юности твоея Христа возлюбил еси, и благодатию Его укрепляемь, вся плотская мудрования умертвил еси, чистым житием и кротким нравом угодил еси Господеви, и по благодати Его на престоле святительства был еси, и явлися еси пастве Христовой Великаго Новаграда пастырь изряден, полагая душу твою о стаде твоём, темже пастыреначальник Христос и по смерти

прослави тя подаванием чудес, от тебе истекающих, подая нам тебе образ добродетельного жития, и теплаго молитвенника.

Темже и аз грешный и унылый, припадая к раце мощей твоих, молюся тебе усердно: угодниче Христов, даждь ми руку помощи, воздвигни мя молитвами твоими из глубины греховныя, се бо волнами страстей плотских и уныния и иными тмочисленными житейскими треволнения обуреваясь погибаю. Буди убо мне многогрешному теплый ко Христу представитель и молитвенник, да и аз от потопления греховнаго избавлен, ко пристанищу благоутишнаго жития благодатию Христовою достигну, и чистым, на конец житием прославлю Спасителя моего, кровию Своею мене искупившаго, и тако житие скончав, получу живот вечный, в славу Отца и Сына и Святаго Духа, ныне и присно и во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**